

<?xml version="1.0" ?>			
<?xml-stylesheet type="text/css" href="home.css"?>			
<Doc id="bod-w-media-	BD00017	"	lang="Bodo">
<Header type="text">			
<encodingDesc>			
<projectDesc>	CIIL-Bodo Corpora, Monolingual Written Text		</projectDesc>
<samplingDesc>	Simple written text only has been transcribed. Diagrams, pictures, tables and verses have been omitted. Samples taken from page 34-35, 70-71, 104-105, 136, 172-173, 202-203, 236-237, 264-265, 306-307, 350-351,		</samplingDesc>
</encodingDesc>			
<sourceDesc>			
<biblStruct>			
<source>			
	<category>	Aesthetics	</category>
	<subcategory>	Literature-Novels	</subcategory>
	<text>	Book	</text>
	<title>	mOsau dAna	</title>
	<vol>		</vol>
	<issue>		</issue>
</source>			
<textDes>			
	<type>		</type>
	<headline>		</headline>
	<author>	prEmacAnda	</author>
	<translator>	ga'binda nArajArI	</translator>
	<words>	2858	</words>
</textDes>			
<imprint>			
	<pubPlace>	India-Kokrajhar	</pubPlace>
	<publisher>	baDa' pAblikEsana barDa	</publisher>
	<pubDate>	2005	</pubDate>
</imprint>			
<idno type="CIIL code">			</idno>
<index>			BD00017 </index>
</biblStruct>			
</sourceDesc>			
<profileDesc>			
<creation>			
	<date>	06-Feb-2006	</date>

	<inputter>	Tumpa Dattagupta	</inputter>
	<proof>	Bridul Basumatary	</proof>
</creation>			
<langUsage>		Bodo	</langUsage>
<wsdUsage>			
<writingSystem id="ISO/IEC 10646">Universal Multiple-Octet Coded Character Set (UCS). </writingSystem>			
</wsdUsage>			
<textClass>			
<channel mode="w">		print	</channel>
<domain type="public">			</domain>
</textClass>			
</profileDesc>			
</Header>			
<text><body>			
<p>	हीराया खाथियाव फैमारैनो पुन्नीनि आखाइयाव हमबाय आरो बुदुनानै गोजानाव लानानै जोनानै बुंबाय, “हारामजादी, नौं जौंनि खोमा-गनथं हानो फैदौं। नौं फिसा फिसा मानषिफोरजौं नांजलायनो थाडो ? बेनिफ्राय सोरनि इज्जोद खहा जाखो बुं ? (आरो खेबसे जोबावो)। आं हजौं नौंनि थाखाइ नेनानै दं आरो नौं बेयाव नांजलायगासिनोसो दंफैयो। सालि, थैनोरोडि। मोदैया जेरै गदौं, जेन’बा हाखरसो जावनानै फबनांगोन।”		</p>
<p>	पुन्नीया हाय ! हाय ! होननानै गाबखाउदौंमोन आरो रायदौंमोन। “नौं हथ’स्रि थांगोन, नौंहा मारखि हाबगोन, बिमा खालिया नौंखौ साव होथौं। आनान ग’साइया नौंखौ खुरिया खालामथौं, आखाइ आइथि खंगा जाथौं।”		</p>
<p>	हीराया जिरन गैयाजासे बिनि रायखाउबाय थानायखौ खोनासंनानसिनो दंमोनब्लाबो बिनि जोबथारनाय रायनाया बिनि मोदोमाव नानायसै। मारखियाव थैनाया बारा खस्थ’ गैया। ओजौं बेराम जायो आरो होजौं बिदाय लायो। नाथाइ खुरिया बेराम। बै मुगैथाव थैनाय आरो बिनिखुइबो मुगैथावसिन जिउ! बियो रागाजौं बिरदाउलायानायसै। हाथाइ अरखेनानै फिन पुन्नीनि सायाव बारसिननायसै आरो खानाइयाव हमनानै बिनि खर’खौ		</p>

	हायाव खुफलेनानै बुंनायसै, “आखाइ आइथिं खंगा जानानै थैगोन, नाथाइ बिनि आगोलनो नोंखौ नायखानानै लागोन। नों आंनि गथ’- गथाइखौ फेदेरगोन ? नों एफा गेदेर नखरखौ सामलायगोन ? नोंथ’ गुबुन हौवाजों खारफालांगोन।”	
<p>	पुन्नीनि बे गाज्जि हालोदआव चौधुरीहा अनखांनाय फैबाय। हीराखौ अन्नाइजों बुजायनो हमबाय, “हीरा गामब्रा, दा आगारलायदो, गोबां जाबाय। मा जाबावगोन बेवायफोरा आंखौ बुबाय बुबायसै आंथ’ फिसा जालाडा। खाफालखौनो साबायखरसै गसाइयानो बै सानखौबो दिनथिबाय।”	</p>
<p>	हीराया चौधुरीखौ रागाजों बुंबाय, “नों सिरि सिरि था चौधुरी। आहां रागा जौफलांब्ला खोथाया गाज्जि जागोन। हिनजाव मानषिया बेबाइदि रायनो हायो, दिनै नोंजों नांजलायदों, गाबोन सोरजोंबा नांजलायगोन। नों गाहाम मानषि। बेखाइनो मिनिनानै फेसैंबाय, गुबुना सहायनाय नडा। जदि गुबुनाबो समानैनो नाडो होनब्ला जांहा मा सन्मान थागोन बुंनायसाय।”	</p>
<p>	बेबायदि बुंनायावनो बुंनायावनो बिहा आरोबाव रागा जौबावबाय। बियो पुन्नीनिसिम होसोलांबाय, एसेयावनो हरिया बिखौ हमथानायसै। आरो बिखौ उनथिं नारहरनानै बुंनायसै, “नै, जाबाय दे। नोंदि बेसेबां बीर जोहोलाव बुहुमआ नुबाय। दा बिखौ नाग्लिनानै जानोसै नामा ?”	</p>
<p>	हीराया दाबो बिदाखौ सिबियो। बिदाजों मोना मोगियै माब्लाबामो नांजलाय फेराखै। बिहा औरैबायदि नांदोंमोन दि जांख्रिगासेयैनो बिदानिफ्राय गबोनो। नाथाइ एसेबां दानथि खालामनो हायाखिसै। चौधुरीनिथिं नायनानै बुंनायसै, “दा मानो गसंनानै दं ? थां औवाया दानहै। आं राजि दं। जौफायाव जिबा राडै लाना थां।”	</p>
<p>	मालतीया मेहतानिथिं नायनानै बुंनायसै, “बेनि सोमोन्दै नोंथांनि मतआ मा मि: मेहता ?”	</p>

<p>	मोनफ्रोमबो सॉथिनि फिन्नायखौ गोमजोरै होनाया मेहतानि हुदामोन। बेखाइनो दसे सम सि थाद'नायसै। उनाव लासै लासै बुंनायसै, “हाबायारि सोमोन्दोखौ जॉनि समाजारि जिउनि मोनसे खुनथिया बुंजायो। नोर-नारि रावहाबो बेखौ नेवसिनायनि मोनथाइ गैया। हाबायारि सोमोन्दो दानायनि सिगां नॉथाडा उदां जानानै थानो हागौ। नाथाइ सोमोन्दो दाखानायनि उनाव नॅथाडा राहा गैयि जायो।”	</p>
<p>	“नॉथांआ जुलि गावनायनि बेरेखा नामा ?”	</p>
<p>	“थारला।”	</p>
<p>	“आरो उदां बहगनि थिरांथानि बागै ?”	</p>
<p>	“बियो बैसोरनि थाखाइ जायफोरा हाबा खालामनो साना।”	</p>
<p>	“गावनि सिनि आबुं जौगासारनायखौ बयबो लुबैयो। हाबाखौ सोर खालामो आरो मानो खालामो?”	</p>
<p>	“बेनिखाइनो बारग'नो बयबो लुबैयो नाथाइ बेबाइदि मानषि जोबोद खम दं, जाय गावनि लुबैनायखौ बोबथानानै लाखिनो हायो।”	</p>
<p>	“नॉथाडा माखौ देरसिन सानो हाबायारि जिउखौ ना हाबालायि जिउखौ।”	</p>
<p>	“समाजारि नोजोर खानथिफ्राय हाबायारि जिउखौ आरो हारसिंआरि नोजोर खनथिनिफ्राय हाबा लायि जिउखौ।”	</p>
<p>	बोरला-जोइगो नाइजाबनि सम जानायसै। जि बाजिनिफ्राय से बाजिसिम बोरला-जोइगो आरो से बाजिनिफ्राइ थाम बाजिसिम फेस्ला फावथाइ, बेनोमोन बै साननि हाबा फारि। जानायनि ज'गार खालामनाय जादों। आलासिफोरनि थाखाइ आलासि खथायाव थानायनि राहा खालामनाय जादों। खान्नामोननि थाखाइ खथानै थिनाय जादों। आरो गोबां आलासि फैदों। बयबो गावबा गावनि खथायाव थांनायसै आरो हि सोलायनानै जाग्रा	</p>

	<p>न'आव ज' जानायसै। बेयाव जाथि-धोरोम बासिलानायनाय गेयामोन। गासैबो रोखोमनि मानषिया ज'यैनो जाजोबदोंमोन। खालि सुजुगिरि अंकार नाथआल' गावनि खथायाव फिथाइनि आदार जानो थांदोंमोन। कामिनीया खान्नानि खर' सानायनि जाहोन जादोंमोन। बेखाइनो बिथांआ आदार जायाखैमोन। आदार जाग्रा नआव आलासिनि अनजिमाया सा बाजिनि खम जायाखैमोन। बेयाव जौ आरो बेदर मोन्नैखौबो दोन्नाय जादोंमोन। बे फोर्बोनि थाखाइ राय साहाबआ बेसेन गोसा जौ लायहोखादोंमोन। मुलिनि मुडाव बिखौ बाहायदोंमोनब्लाबो, नाथाइ बेयो जौआनो मोन। बायदि रोखोम बेदर संनाय जादोंमोन। बेदरनि क'प्ता, काबाब आरो पलाव। बोरमा फानथानि बेदर, बोरमा खासिनि बेदर दाव बेदर, मै बेदर, दाउफ्रिउ, जाय जेखौ मोजां मोनो जानो हायो। जानाया जुरिबाय। मालतीया सौनायसै, “जौनि सुजुगिरि बिथांआ बोर्जो थांखो ? राय साहाब सोरखौबा थिनहरनायसाय बिथांखौ हमनानै लाबोंथो।”</p>	
<p>	<p>राय साहाबआ सौनायसै, “खान्ना नोंथा। बे बिफां बिलाइफोरखौ लानानै नोंथाडा मा खालामनो ?”</p>	</p>
<p>	<p>खान्नाया मिनिस्तु मिनिनानै बुंनायसै, “आं बेर्जो बेफार खालामगोन।”</p>	</p>
<p>	<p>“आंनोबो बै लामाखौ फोरोंगोन दा ?”</p>	</p>
<p>	<p>“जागोन। जागोन। फोरोंगोन। सिगां नोथांआ धुप-धुना लानायै गणेशजीखौ फुजा खालामगोदो। बिनि उनाव खोनथागोन। आंनि खाथियाव बाइदि रोखोमनि मानषि फैयो राय साहाब नोंथां। खायसे औरैबायदि मानषि फैयो जाय लाइफां मुलिखौ फोथायो। बिथांमोना जदि बेखौ मिथियो, बेफोरखौ सोरबा सादु-बैरागीया होलांदों, अब्ला नोंथांखौ हमथाबबाय थागोन, आइथिंआव हमगोन, नोंथाडा जदि जिरादखौ होयो होनब्ला जिउ नाडैनो</p>	</p>

	नोंथांनि ग'लाम जानानै थागोन। थायसे राडाव जदि सा जि, नैजि आदुवाखौ आखाइ खालामनो हायो मा खोथि ?”	
<p>	<p>राय साहाबआ गोमोहाबनांनै सौंनायसै, “नाथाइ बे रोदाफोरनि मुडालाइ नोंथानियाव बोरै गोसोआव थानो ?” खान्नाया ग्लाब ग्लाब मिनिनायसै, “नोंथाडाबो जोबोद जाम्बा रायसाहाब ! दानि मुंखौ गोसोआव लाखिनो मा दोरखार ? नोंथांनि गोसो मथे माबा मोनसे बुंभलानो जागोन। नोंथांखौलाइ सोर आनजाद नायनो फेगोन ? नोंथाडादि गेदेर गेदेर अफिसार आरो लाखपतिफोरखौ नुदों, गासिबो फोथायखानाजोब। आं लाइफां मुलि सास्त्रनि सासे फोरोंगिरिखौ मिथिगौ। आंमि स्वामीजीया बिखौ लानानै जोबोद रोंगो खालामो। नोंथाडा बिखौ माब्लाबाबो नुवाखै। बे बाराव फेब्ला नोंथांनो दिनथिगोन। बियो जेब्ला आंनि बिबार बारियाव थायो, सान-हर मानषिजों खोब खोब जायो। मोनसेबो बेसादनि फारसे बिहा माया-ममथा गैया। खालि बेलासेल’ गायखेर लोडो। बेबायदि रोंसार गेदेमा सुबुं आं जिउवाव नुफेराखै। बेसेबां बोसोर हिमालयाव थफस्या खालामदोंमोन। बियो थारैनो सिदद’ फुरुष। नोंथाडा बिनिफ्राइ दीक्षा लादो। आंनि फोथाइनाय नोंथांनि बे जेंनाफोरा सुफुंजाजोबगोन। नोंथांखौ नुब्लानो नोंथांनि उन-सिगां बुंनानै होजोबगोन। बिथांनि सेहेराया औरैबायदि दिदोम, खोमथा आरो रंजा-खुसिदि नुब्लानो नोंथांनि गोसोआ थाजिम जालांगोन। नाथाइ जोबोद सोमोनांथाव बाथादि, बेफोरबायदि सासे गेदेमा जानानैबो बिथांआ बैरागी आरो बाउनाय, मन्दिर थानसालि, बबेबा जाथि आरो हानजाखौ बयखौबो फान्दायसुला होननानै बुडो, नास्तिक होन्नानै बुडो। बिथाडा बुडो, “फोथायखानाखौ नागार आरो असे मानषि जा, मोदाइ जानायनि आसाखौ नागार, मोदाइ जाब्ला नों मानषि जानो हानाय नडा।”</p>	</p>
<p>	राय साहाबनि गोसोआव गिनाय सोमजिनायसै। गेदेमाफोरनि	</p>

	<p>फारसे बिथांहा गोथौ फोथाइनाय दंमोन। गाव-सानहाबनायनि फिथायजौं दुखुथिया जिउवाव जा गोजोन मोन्नाय जायो बिनि थाखाइ बिथांहाबो लुबैखुमानाय दंमोन। जेब्ला मानसिया रां-रुफानि आंखालाव निरासा जायो, अब्ला औरैबायदि मोनो जेनो, संसारनि माया-ममथाखौ नागारनानै हास्रि-हुस्रि जायगायाव हारसिडै गोसोनि मक्ष लाभ मोन्नो।</p>	
<p>	<p>हरिनि मेगन थाइनैया मोदैजौं सिग्लाबनायसै। धनियानि बे बिमा अन्नाया बै खोमसियावबो आलारि बाथि बायदि बिनि जिंगाजौं जग्लायनाय देहायावबो जौंसारनाय लाबोदौंमोन। सानैनिबो गोरबोआव जेन गोमालांनाय जौमोना फिन जौंखांफिनबाय। हरिया बे बुरैनि गेजेराव बै गुरै गोसोनि हिनजावसाखौ मोन्दांनायसै, जाय, नैजिबा बोसोर सिगांनो बिनि गोसो सिंआव हाबसनदौंमोन। बे गोबानायाव जौमोननि बिलिरनाय दंमोन, जाय गासिबबो बादा-हेंथा, जिनिर आरो सोलिखानथिखौ गोबानानै लानो हायो।</p>	</p>
<p>	<p>न'नि दरखं मोखांआव फैनानै सानैबो नायखंखे फैनायसै। गंसे हानि साथि जौंगासिनो दंमोन आरो हानथुआव खर' एरसोनानै झुनियाया जनानै दंमोन। बियो जेनोबा खोमसियाव बै सोरगोनि गोजोन जौंथि रोदाखौ दांग्रोमबायदौं, जाय दसे सिगांसो मुहिनि माया दिनथिनानै गोमालांबाय। खाफालनि लिरनाय आरो मानषिनि मुगैनाय, मोहेरनाय बोरलानि बानजौं थेर-बेथेर जानाय बिनि गोरबोआ फांसे बट बिफांनि सायावाव जिरायनो नागिरदौंमोन। बियो औरैबायदि मोनसे जिरायखुलि मोन्दांमोन, जेराव गावखौ सुखि, आरो बैजानाय होन्नानै सान्नो हादौंमोन, नाथाइ दिनै बि सुखु-सिमांआबो आलाउदिदननि राज उलाफादनि गोजोननि आलारी बाथि बायदि स्रोब गोमोरलांबाय। इयुना बिखौ राइखस जानानै मन'ग्लाबनो नेनानै थानायसै।</p>	</p>

<p>	हरखाब दरखं गेंनाय लोगो लोगो हरिखौ नुनानै बियो खमफिखांनानै गसंनायसै। आरो हरिनि आइथियाव हमनानै गाबै गाबै बुंनायसै, “आफा, नॉनि सोलाइ दा आंहा रावबो गैलिया। नॉ आंखौ दानथारो, बुथारो जा गोसो खालामदो, थेवब्लाबो न’निफ्राय दादिहूनहरसै।”	</p>
<p>	हरिया बिनि बिखुंआव बिलिरनानै अन्नाय रावै बुंनायसै, “मानो गिनांगौ फिसा, बेयो नॉनिनो न’। नॉ जॉनिनो फिसा। नॉ जेरै भ’लानि फिसाजो, बेबायदिनो आंनिबो। जॉ थांनानै थासान्दि नॉंखौ रावबो गाज्जि नोजोरै नायनो हाया। नॉ जेबो दासान। भज-फान्द्रा होनांगौ आं होगोन।”	</p>
<p>	हरिनिफ्राय फोजोन्नाय मोननानै झुनियाया बिनि आइथिंआव हमनानै खुलुमनायसै। “आफा ! दा नॉंसोर सानैयानो आंनि बिमा, बिफा। आं माउरिया ! आंनो जायगा होदो। नडाब्ला आफा-आदा मोनहा आंखौ बुथारगोन।”	</p>
<p>	धनियानि बिमा गोरबोआ आउलिखांनायसै। आबेगजॉ गाबनानै, बुंनायसै, “न’आव थुदो फिसा। नोमफाखौ जॉ नायगोन।”	</p>
<p>	खान्नाया बागदावखांबाय। मालतीखौ बुरखायनो थांनानै उलथासो गाब्र’बाय। बियो बुंनायसै, “बेफोरखौ मेहतायासो हासिगौ।”	</p>
<p>	“जाक्तार साहाबआथ’ गावनि खोथाखौ बुंनानैनो होबाय आरो नॉंथांनि बायदिब्ला बेयो जौ बोसोरनि गोजाम, आंखाइनो गोदान राहानि खोथाखौ नोथांआनो बुंनाया मोजां जागोन। नॉंथांहा जानो हागौ नैबे रायथानि बागै गियान गैयागोन दि, बुहुमाव औरैबायदि माखासे खोथा दं, जायफोरा माब्लाबाबो गोजाम जानो हाया। समाजाव बिब्दि जेंनाया जेब्लाबो जाबोगासिनो दं आरो जाबायबो थागोन।”	</p>
<p>	खान्नानि मिसेस्आ खामसालिसिम आंखारबोदोंमोन। मोहताया बिथांनि खाथिसिम फैनानै सॉनायसै, “आंनि बिबुंथिखौ बोरै	</p>



	मोनखौ ? ”	
<p>	मिसेस खान्नाया मुसुगुर बोखोनानै फिन्नाय होनायसै, “खोब माजां जादों। नाथाइ नोंथांडा दाबो दांगुवा जानानैनो दं, बेखाइनो नारीया नोथांनि थाखाइ मोदायजो, देरसिन आरो बिगुमगिरि। हाबा लाग्रोसाय, उनाव सोंगोन नारीया माबायदि ? जुलिखौथ’ नोंथाडाबो लाखानांगोन। मानोना बेखौ गिनानै खारखुमानायखौ नोंथाडानो गोहो गोलोन्दां बुंखाबाय।”	</p>
<p>	मेहताया मिनिनानै बुंनायसै “बेखाइनोथ” देहा-गोसो थियारी खालामगासिनो दं आं।”	</p>
<p>	“मिस मालतीजों नोंथांजों मोजां जुरा जाथारगोन।”	</p>
<p>	“बिदिब्ला आंहा मोनसे रदाय थागोन दि, बिथाडा नोंथांजों थाफानानै नारी घोरोमनि सोमोन्दै सोलों नांगोन।”	</p>
<p>	“नोंथांआ माबा रदायसुला हौवा बायदि बाथ्रा बुंदों। नोंथाडा हौवानि धोरोमनि खोथा सोलोंबाय नामा ?”	</p>
<p>	“सोरनिफ्राय सोलोंनो, बिखौनो सानदों।”	</p>
<p>	“मिष्टार खान्नाया नोंथांनो मोजां फोरोंनो हागोन।”	</p>
<p>	मेहताया ग्ला ग्ला मिनियो आरो बुडो,-	</p>
<p>	“नडा, आं हौवानि मावनांथायनि खोथाखौबो नोंथांनिफ्रायनो सोलोंगोन।”	</p>
<p>	“साबगौ, हौनब्लालाय! आंनिफ्रायनो सोलोंदो। नाथाइ सिगां बावग्रोनांगोनदि नारीयानो देरसिन आरो गिरिस्थनि गासिबो बिबाना बिसोरनि। हौवाफोरासो देरसिन आरो बिसोरनि सायावसो गिरिस्थनि गासै बिबाना थायो। नारीनि सिबिनाय, गोसो हमथानाय, मावनांथाय बेफार गासिबखौबो हौवायासो सोरजिहोनो हायो। बिसोरहा जदि बेफोर गुणआ आंखाल जायो, अब्ला नारीयाबो बोराबखानो हागौ। नारीनि गेजेराव दिनै जा बिग्रायनाय जागाय जेनदों, बिनि जाहोना जाबाय हौवाफोरनि गेजेराव बेफोर	</p>

	गुणआ आंखाल जाबोनायनि थाखाइसो।”	
<p>	मिज्जाया फैनानै मेहताखौ गोबानानै लाना बरायनायसै। मेहताया बुंनायसै, “आंनि बिबुंसारखौ नोंथाडा फसायदों दा ?”	</p>
<p>	“बिबुंसारा जियानो दाजा लै, नोथाडा नाथाइ देरहाथारबाय।”	</p>
<p>	सानसेखालि बेलासियाव बियो लामा सेराव थानाय दमखलाव दुगैनानै फैना बिलिफांनि थाखाइ था रुनो लादोंमोन। एसेयावनो मिज्जा खुर्चीदआ फैनानै बिनि न’ लांगोनायाव गसं फैनायसै। ग’बरा दा बिनि बान्दा नंलिया, नाथाइ दाबो बियो बिखौ बिगुमा बायदि बाहायो, आरो बिनि थाखाइ जिउ होनोबो थियारि जानानै थायो। खाथिसिम फैनानै सोंफैनायसै , “मा बिथोन दं साहाब ?” मिज्जाया गसंनानैनो बुंनायसै “नोंजों लोगोआव फैसा दंब्ला हरनायसाय। दिनै सानथामनिफ्राय आंनि बथलफोरा उदां जानानै दं। बेखायनो गोसोआ बोरैबा बोरैबा मोनथारबाय।”	</p>
<p>	ग’बरआ बिनि आगोलबो बिनो खेबनै-खेबथामसो फैसा हरदों। नाथाइ दासिम मोनफिनाखै। बियो बिनो आरो मिज्जायाबो लांखांब्ला होफिन्नो गोसो जाया। बिनि आखाइयाव फैसायानो थाया। फासैखे फैयोब्ला गुबुमथिं गलाडो। ग’बरआ फैसा गैया होन्नानैबो बुंनो हायाखैसै आरो होआ बुंनोबो गोहो जायाखैसै। बेखायनो बियो जुमायखौ मुगैनानै बुंनो हमनायसै, “नोंथाडा बिखौ गारा मानो ? बिखौ लोंनानै मादि मुलामफा जायो ?”	</p>
<p>	मिज्जाया खथा सिडाव थानाइ फारखं सायाव जनानै बुंनो हमनायसै, “नों सान्दोंनामादि, बिखौ आं गारनो नाजायाखै ? नाथाइ मा खालामनो ? जौ नडाब्ला आं थानानै थानो हाया। नों फैसानि थाखाइ जिंगा सिनो नाडा। आं होफिनगोन।”	</p>
<p>	ग’बरा थेवब्लाबो दिदोमै थानायसै। बुंनायसै, “आ थार बुंदों मालिक, आंनि आखाइयाव फैसा थानाय मोनब्ला नोंथानो होगौमोन आं।”	</p>

<p>	“थायने रांखौबो होनो हायादा ?”	</p>
<p>	“दा हाया।”	</p>
<p>	“आंनि आस्थामखौ बन्दखीयाव लाखिदो।”	</p>
<p>	आसथामनि खोथा खोनानानै ग’बरनि गोसोआव लुब जानायसै। बियो साननो हमनायसै खोथाखौ बोरै सोलायनो हायो। बुंनायसै, “नै, नोथाडा मा बुंदों ? फैसा थानायमोनब्ला होगौमोनानो होन्दों, आस्थामखौ मानो ?”	</p>
<p>	मिज्जाया जोबोद दुखुजों बुंनायसै, “आं आरो उनाव माब्लाबाबो नौनिफ्राय फैसा बिलिया ग’बर। आं गसंनानै थानो हायाखै। बे जौनि थाखाइनो आं लाख रांनि सोम्फोथिखौ फोजोबनानै लाबाय। आरो दा बिबायारी जानांबाय। दा आं समाय लाबायदि, माब्लाबाबो जौ गारा नांगौब्ला बिनानैनो जागोन।”	</p>
<p>	उनथारवबो जेब्ला ग’बरा फैसा हरा बुंबाय, अब्ला मिज्जाया सिखारनानै आंखारलांनायसै। नोगोराव बिहा गोबां लोगो दं, बेसेबां मानसियादि बिनि जोहैनो दोहोनि जालांबाय। बेसेबां मानसिखौ बियो नांगौ समाव हेफाजाब होबोबाय। नाथाइ दा बिफोरनि खाथियाव थांनो गोसो जाया। फैसानि फार्से बिहा माब्लाबाबो हाबिला गैयामोन। फैसा आखाइयाव थायोब्ला बिनि गोसोआ दुम दाम खालामनानैसो गोजोन्नाय मोनोमोन।	</p>
<p>	मि. तंखाया गंसे सफायाव जनानै सिगारेटनि उखुन्दै बिरहो बिरहो बुंनायसै, “बिनि थाखाइ आं उनदाहा खालामो। आं मोनसे गोनांथार हाबायाव नांथाबनानै दंमोन। नौंथाडा फ’न खालामनानै सिगांनो बुंखाहरनांगौमोन।”	</p>
<p>	जौनाय अराव गेहुसो गोलैबाय जेन’। नाथाइ राय साहाबआ गावखौ हमथानायसै। मानोना बियो जुजिनो फैयाखै। बे लाजिफोनांनायखौ बियो मन’नायसै आरो बुंनायसै, “नंगौ, आंहा गोरोन्थि जालांबाय। नौंथांहा दा गोबां खामानिगोन, जानो हागौ	</p>

	समानो गैया।”	
<p>	“नंगौ, गोबां खामानि, नडाब्ला फैथारगौमोन।”	</p>
<p>	“आं नोंथांनाव खोथाखौ सोंथारनो फैबाय। गोरोबथानि मोनबो आसा नुहोराखै। आरो हजों बिसायख’थिनि लाहार-फाहारफोरा दुम-दामै जादोंसै।”	</p>
<p>	“राजासाहाब मानसिखौ नोंथाडा सिनायखायो। बियो रेजें गोसोनि मानसि। माबा नडा माबा मोनसे बियो थांखि लाबायआनो थायो। दा बियो नै बेखौ सान्दों दि माबा मोनसे नडा माबा राहाजों राय साहाबखौ गंग्लाय होनांगोन। बेखौ जेब्ला बियो अस्त्रायै लादों, दा आरो रावनिबो खोथा खोनासडा, नांगौब्ला जेसेबां खहा होनांगौब्लाबो होरिगोन। अजायै ब्रैजि लाखनि दाहार दंखायोनो, थेवब्लाबो बियो जेरावनो मेरावनो खरसा खालामदों। फैसानि खोथाखौनो साना। खामानि मावनाय मानसिफोरनि बेथनखौबो दान द’नि गोजो होनोनो हायाखै। ओजों हीरानि बांला लुदों। ओरैबायदि सावगारि एरहोदों नायब्लानो मेगना बावगोमायो। खोनादों, बेयाव सोरबा गुफुरसा मेनेजार थागोननो।”	</p>
<p>	“होनब्लालाय नोंथाडा सिगां गोरोबथा खालामना होगोन होन्नानै माबोरै बुंदोंमोन ?”	</p>
<p>	“आं जेसेबां हायो खालामना होबाय, बेनिफ्राय आं आरो मा खालामबावनो हायो ? सोरबा सुबुडा लाखथाम लाखब्रै रां दैयाव फेसेवनो सान्दोंब्ला, होनब्लाबाय आं मा खालामनो ?”	</p>
<p>	राय साहाबआ आरो गावखौनो हमथानो हायाखैसै। बियो बुंनायसै, बिनि बै लाखथाम-लाखब्रै रांनिफ्राय नोंथांनोबो जि नैजि रां होनायनि आसा दं जेब्ला ?”	</p>
<p>	मिष्टार तंखाया मालाय मानोसिरि थानो ? बिबो बुंनायसै, “राय साहाब नोंथांआ बिदि दाबुं। बे संसाराव नोंथाडाबो सादु नडा। आंबो नडा। जों बयबो माबा नडा माबा राहाजों धोन आर्जिनायनो	</p>

	<p>सानो, नोंथाडाबो सानो, आंबो सानो। नोंथांखौ बिसायख थियाव सिखारनो थिनदोंमोन, आरो से लाख रांनि हाबिलायाव नोंथाडाबो सिखारबाय। जदि आं बुंनायबायदि खामानि मावनाय जायोमोन, होनब्ला नोंथाडा से लाख रांनि बिगुमा जानानै रावनिफ्रायबो दाहार लायालासिनो कुमार साहाबजों सोमोन्दो दानो हागौमोन। आरो आदालदआव मखरदमाबो खुंनो हागौमोन। नाथाइ नोंथाडानो खाफाल मोन्दादि जाथायफोरा जों सान्नायबायदि जायाखैसै। नोंथाडा गोरा जानानै थाबाय जेब्ला, आंहालाय मा मुलाम्फा जानो ? फालो दान्नानै बिथानि खाथियाव फैनायसै। जायखिजाया राहयैब्लाबो बे बैतरजीखौ बारनांगोन।”</p>	
<p>	<p>स'नाया जिस्नि बोसोराव आगान होबाय। बिखौ हाबा होनो सम स'बाय। थांनाय बोसोरनैनिफ्रायनो हरिया बिखौ हाबा होनायनि खोथा सानबोदों, नाथाइ आखाइयाव रां-रुफा गैयियाव दाउगानो साहस खालामाखैमोन। देग्लाय दाहार लानानै एबा गायग्रा हा बन्दखि दोन्नानैब्लाबो जेरैइखि जाया बिनि हाबाखौ फाथिथारनांगोन। हरिनि मथे खामानि जानायमोनब्ला दिनै बोसोरनैनि सिगां बिनि हाबाया जालांगौमोन। बियो आखाइ हमथानानै बाहायनो नागिरो। नाथाइ धनियाया बिनि खोथायाव राजि जाया। जेसेबांखि आखाइ हमथानानै खरसा दाखालामार्थो मानो, थेवब्लाबो हाबायाव नैजौ-नैजौबाजिसो रां नांखागोनआनो। ग'बरा झुनियाखौ लाबोनाय उननिफ्रायनो औरैनो फोलेराव बिसोरनि जायगाया हेव जालांदोंमोन। दा जौसे-जौनै रां हरफायाब्ला मोजां फोलेरनि गथ' मोन्नाय नडा। आगोलनि बोथोराव आबादनिफ्राय मोनबो खामायानो हायाखैसै। जा जाबाय बिनिबो दातादीननो खावसे होनांबाय। बियो माइलि आरो खामलानि मुडै गावनि हिसाबाव दानख'ना लानानै जेसेबां रां होबाय, बिबो खाजोना होनायावनो थांजोबबाय। खुसेर आरो फाथो</p>	</p>

	<p>आबादआ जायाखैसैयानो। देग्लाय हले आबादआ हामसाबदों। हाबानि थाखाइ जानायखिनिया जाबायानो जेनिबा, नाथाइ रां नैजौवा बहानिफ्राय फैगोन ? ग'बरा सेजौ रां हरनानै मदद खालामोब्ला बियो आद्रा सेजौखौ जैरैखिजाया बुथुमनो हागोन। झिंगुरी सिंह आरो मगरुचाह सानैबो दासान्दि इसि दद्र'ना दं। ग'बरा अर्जिनो हानायखाइ बिसोरनि मोननो गोनां फैसाखौ दा मोनगोन होननानै सानदों। सानसेखालि हरिया ग'बरनि न'सिम थांनो आंखारनायसै। धनियाया ग'बरनि गोखा रावफोरखौ बावनो हायाखैमोन। बि ग'बरनिफ्राय फैसा गरसेबो लानो राजि नडामोन।</p>	
<p>	<p>हरिया हब्रानानै बुंनायसै, “होनब्ला खामानिया बौरै जानो, नॉनो बुंनायसाय ?”</p>	</p>
<p>	<p>धनियाया बुंनायसै, “ग'बरा खामायामोनब्ला नों जा खालामगौमोन, दा बिखौनो खालाम।” हरिनि खुगानि रावआ गोमानायसै। दसै सि-सि थानानै उनाव बुंबाय, “आं नॉनाव बिखौनो सोंदों, मा खालाम नांगौ आं ?”</p>	</p>
<p>	<p>धनियाया बुंनायसै, “बिफोरखौ सान्नाया हौवा मानसिनि खामानि, जौनि नडा नडाना।”</p>	</p>
<p>	<p>हरखाब गोबां मानसिखौ मिल फारसे खारलांनाय नुनो मोन्नायसै। खान्नाया गसंखांनानै हज्रिना सौहरनायसै, “नॉसोर बोजों खारलांदों ?”</p>	</p>
<p>	<p>सासे मानसिया थाथ'ना बुंनायसै, “सिनि मिलाव अर नांदों। नोंथाडा नुहराखै ?”</p>	</p>
<p>	<p>खान्नाया मेहतानिथिं आरो मेहताया खान्नानिथिं नायबाय। मालतीया खारलांनानै जन्ता ज'राखौ गान्ना फैनायसै। बोरानो एबा दाय हमनो सम गैयामोन। रावनिबो खुगानिफ्राय सोदोब मोनसेबो आंखाराखैसै। खैफोराव जौनि सान्नायफोरा थन्थ'</p>	</p>

	लाडो। खान्नानि गाडीया नैनानै दंखायोमोन। साथामबो बियाव गाखोनानै मिलसिम थांनायसै। आलि थखासिम मोनहैब्ला नुबायदि नोगोरनि गासै मानसियानो मिलथिं खारबो गासिनो दं। अरहा मानसिनि गोसोखौ बोनो हानाय गोहो दं। मानसिनि बिहिरनि थाखाइ गाडीया आवगायनो हाया जानायसै।	
<p>	मेहताया खान्नानाव सौंनायसै, “मिलखौ बीमा खालामबायमोन ने ?”	</p>
<p>	खान्नाया हांमा सुरनानै बुंनायसै, “बीमानि थाखाइ लेखा-फरा खालामहांदोंसोमोन, बेबायदि जागोन होन्नानै सोर मिथिनो ?”	</p>
<p>	गाडीखौ बियावनो दोन्नानै बिसोर साथामबो मानसिनि बिहिर बोखावनानै मिलनि खाथियाव नुजाहैनायसै। सोरगिदिं मिलखौ अरा आवग्रि जोबदों। अरनि लें लें सालाइया जेनो अख्रांखौबो सोलानो नागिरदों। शावन दाननि दाउखा बिदै जोमैबायदि उखुन्दैया गासै अख्रांखौनो जाख्लोबदोंमेन। गोबां मानसि थुबुर जाबाय, फुलिसबो फैबाय। अर खामोरग्रा गाडीबो फैबाय आरो सिबि आफादनि मावसोमग्राफोरबो नुजाफैबाय। नाथाइ अरनि बे मन'ग्लाबनायनि खाथियाव बिसोर लोर्लाज्जब जाजोबनायसै। अर खोमोरग्रा गाडीया सारनाय दैया अर दुंनायाव खफ' जानानै बिरलां दोंमोन। मिलनि इथा, सोरनि मुवाफोरा खामनानै सय-हांगार जालांदोंमोन। सिनिफोरा आवलि आवलि सोरगिदिं बोहै लांदोंमोन। हाफोरबो खामलांदोंमोन।	</p>
<p>	मेहता आरो खान्नाया सोमो नांदोंमोनदि इसिबां मानसिफोरा मा नायनानै दं, अर खोमोरनायाव रावबो नांफायाखै मानो ? दासो बिसोरबो मिथिबायदि, बेयाव रोंगो नायनायनि अनगायै मावनो मोनबो राहा गैया। मिल इनजुरनि बाजि गज खाथिसिम थांनायानो गोब्राबमोन। इथा आरो अन्थायनि खामखोनदा फिथरफोरा बेरफ्रावबोदोंमोन। आरो बे जायगानि बारआबो	</p>

	दुखांदोंमोन।	
<p>	मेहता, खान्ना आरो मालतीया बिहिरनि उनथिंजाय आख'- फाख'यै गसंनानै दंमोन। अरा बोरै नानो मोनखो ? इसिबां थाबै बेबायदि माबोरै गोसारनो हाखो ? सिगां रावबो नुवाखैमोन दा ? एबा नुनानैबो खोमोरनो नाजायाखैसैनामा ? बेबायदि सोंथिफोरा बयनिबो गोसोआव जायगा लादोंमोन। नाथाइ सोंलायखो सोरनाव ? बिहिरनि गेजेराव थारै मिलनि मावख'ग्राबो दंगोन। बिसोरखौ नागिरना मोन्नाया गोरलै नडा।	</p>
<p>	मालतीया ग'बरखौ गावनि बिबार गायग्रा खालामनानै लाखिनायसै। सानसेखालि बियो जबा नायनानै फैफिनदोंमोन। लामायाव पेट्रल गैया जाबाय। बियो गावनो गाड़ी-सालायदोंमोन। पेट्रलखौ बोरै लायलायखो ? मोनानि गु बाजिबाय। मागो मांसोनि थोर थोर गोजांनाय, लामायाव जिब-जुनार मासेबो गैया। जिथिंबो सुन-सान-सि। बिहा राहा गैयि जानानै नखरनि दाहोननानि सायावसो सिरि सिरि रागा जों गासिनो दंमोन। बेबायदि समावनो हरखाब ग'बरा बिथिं फैगासिनो दंमोन। मालतीखौ नेबाय थानाय नुनानै बि बिनि थासारिखौ बिजिनो हानायसै। आरो गाड़ीखौ फारलंनै नारनानै पेट्रल पाम्पसिम लाबोनायसै। मालतीया गोजोननानै सोंनायसै, “नों साखि मावनो नामा ?”	</p>
<p>	ग'बरा साबायखरजों राजि जानायसै। बिनि बेथनखौ दानफायाव जिबा राडै थि खालामनायसै। बिबार गायग्रा मालीनि खामानिखौ बि मोजां मोनोमोन। दारिमिन (खारखाना)नि खामानियाव मुजुराखौ बारा मोनोमोन, नाथाइ बेयाव मोनबो गोजोन्नाय गैयामोन।	</p>
<p>	उनसाननिफ्रायनो ग'बरा मालतीनि न'आव खामानि गावनो लानायसै। बिनो थानो थाखाइ मोनसे खथा होनाय जानायसै। आरो बि बियावनो झुनिया आरो मंगलजों थानो लानायसै।	</p>



	मालतीया जेला बिबारबारीयाव फैयो अब्ला मंगलआ हाद्रि हालाजों गेलेबाय थायो। सानसे खालि मालतीया बिनो मोनसे मेथाय होनायसै। बै साननिफ्रायनो बिहा हुदा जानायसै। बिखौ नुब्लानो बियो लोगो लायो जेब्लासिम मेथाय होआ उन नागारा।	
<p>	सानसेखालि बिबार बारीयाव फैनानै मालतीया गथ'खौ नुवाखैसै। झुनियानियाव सांनायाव बिखौ लोमजादों होन्नानै मिथिनो मोन्नायसै।	</p>
<p>	मालतीया बागदाव खांनायसै, “लोमजादों, आंनि खाथियाव लाबोआखै मानो ? थु बिखौ नायहैनि।”	</p>
<p>	गथ'वा लोमजानानै ओलैश्रो गोलैनानै दंमोन। बै फिसा खथाया इसिबां खोमसिमोन आरो गोजां बोथोरावबो बियाव इसिबां थामफै दंमोन, मालतीया बियाव मिनिटसेबो थानो हायाखैसै। गोख्रै फैनानै बि थार्ममिटार होनानै लोमजानायखौ नायनायसै। अब्ला बिनि लोमजानायनि बिदुडा सेजौब्रै डिग्रीमोन।	</p>
<p>	दासिमबो बिनो थिखा जोनाय जायाखैब्ला आइ आंखारगोन। मालतीहा जोबोर गिनाय फैनायसै। बे खोमसि खथायाव थानानै बिनि लोमजानाया बांसिनोब्ला।	</p>

</body></text>

</Doc>